

DEO OPTIMO MAX.

UNI ET TRINO,

VIRGINI DEIPARÆ, ET S. LUCÆ,

Orthodoxorum Medicorum Patrono.

QUÆSTIO MEDICA,

QUODLIBETARIIS DISPUTATIONIBUS

manè discutienda, in Scholis Medicorum, die Jovis,

17. Februarii 1729.

M. DESIDERIO-CLAUDIO FREMONT,

Doctore Medico, Præside.

*Confert-ne ventriculi motus, ad elaborationem chyli?*

I.



OTU vivunt animalia, motu pereunt. Humores scilicet & spiritus agitatione continuâ vitæ functiones absolunt: sed præcipiti dum cursu vehuntur, cutis repagula transiliunt; & quâlibet horâ, solidarum quoque partium, quas fugiendo diruunt, corpuscula secum abripiunt. Brevi itaque viventes deficerent, si perpetua hæc tam solidarum quàm fluidarum particularum damna non repararent alimenta. Hæc ideo sicca vel liquida (fame & siti jacturæ majoris interpretibus,) appetunt animantes: utraque verò ex variâ rerum dissimilium congerie genita; diversis enim partibus rescendis alimentorum mixtione provideretur. Iniquè igitur de sorte suâ nonnulli quaeruntur, quòd arentes fauces proluere non liceat aquâ, à quibuslibet rerum vicinarum effluviis expeditâ; vel quod nullis aurum diffluat liquoribus, qui possint impunè ventriculo committi. Vix enim utile quidquam nutritioni pura conferunt elementa, vel metalla, Aurum omnium minime; quippe quod sibi pertinaciter coheret; quia similibus ex partibus coalescit, nulla corporis alieni societate discretæ. Ne credas tamen alimenta quò sunt pluribus composita, eò magis esse alendo corpori idonea. Profunt quæ natura concessit, nocent quæ miscet ars gulæ delitiis addicta. Lædunt cœnæ dubiæ, & mixta assis elixa,

2  
Conchylia turdis. Hæc enim confusa, stomacho tumultum inferunt; & ventriculo vix ex tanto rerum dissimilium acervo chylum elaboranti, negotium ingens facessunt.

## II.

**C**ANDIDO rore quem mammæ nutricis effundunt, nascentes pascimur. Albo liquore quem ventriculus subministrat, toto vitæ decursu reficimur. Humor ille ex cibis attritis, coctis, expressis effluens, chylus est: ut lacti colore & substantiæ modo, sic & facili unius vicissim in alterum mutatione, congener. Ex lacte nimirum, tenellis infantium, & languidis convalescentium ventriculis, citissimè chylus generatur; nec minùs expeditè, è chylo cum sanguine ad nutricum mammæ affluente, lactis penuria reparatur. Ex liquidis ille solidisque manat alimentis, citius quidem & facilius, si mollia & simplicia, longo verò & vehementi ventriculi nisu, si dura & composita devorentur. Cum enim chylus, ut fiat accommodatum sanguini rudimentum, æqualis, fluidus, & albus evadat necesse sit; quò plura ab hisce conditionibus remota ventriculo traduntur, eò validiori fibrarum contentione dura mollibus, siccis liquida misceat opus est, ut res dissimiles in cremorem uniusmodi coalescant. Hic si labem aliquam, dum in ventriculo versatur, contrahat; si nimirum, aut febrili calore illi nidor inuratur, aut refluxente è pancreate succo acrius ebulliens, acescat, vel, resolutis ventriculi fibris, minùs subactus elaboratur; vix aliorum viscerum ope culpa deletur; & licet à crassioribus partibus attritionem aut coctionem eludentibus, à jejuno ad cæcum usque intestinum, expressione successivà liberetur; & à fœcibus expeditus vasa destinata subeat: nihominus delicta ventriculi luit immerita cruoris massa.

## III.

**V**ENTRICULUM principem esse primæ coctionis officinam, situs ejus & adnexa testantur. Medius est gulam inter unde excipiat alimenta, & intestina quibus illa in chylum mutata committat. Ambitu suo finum, ad cibos continendos, viscerum omnium capacissimum complectitur. Tantà verò fervidi sanguinis copiâ è propinquo corde, innumeris arteriis quâlibet discurrentibus, alluitur; calidissimaque illum viscera hepar scilicet, lien, pancreas, imò fons ipse caloris, & ab eo præceps æstuantis sanguinis rivus, tam arctè fovet & ambiunt: ut palàm constet, tanto caloris apparatu non privatæ partis incolunitati, sed publico culinarii visceris foco provideri. His porro cum & salivæ, quæ cibus, cum dentibus teruntur, accidit, & liquoris è glandulis gulæ & stomacho appositis decidui, fermentum sit annumerandum; extrà dubium est, multiplici adeò caloris incitatione, in ventriculo cibos ad ebullitionem promoveri. Ne tamen illum putes, lebetis instar ardenti foco impositi, effervescentia alimenta otiosum continere: idque unum agere, ut onus suum quàm proximè amiat, & oculis exactè obsignatis donec in chylum abeat, amplectatur. Neque ut illum ab inerti vendices otio, ab eo chylum absolvi, fabulosâ non minùs quàm inexplicabili substantiæ proprietate contendas. Verùm ut facilè, quid ad chylaseos complementum ventriculus conferat, intelligas; ipsius structuram, tunicas, nervos, sedulus inquire. Quæ scilicet media illi est membrana, carnosâ, & omni fibrarum genere intertextâ, uti staminum ordine, multiplici

3

nervorum distributione, & carne tendonum æmulâ, musculi faciem refert; sic & musculi quoque munus obit: neque solum rectis fibris rapit alimenta, transversis expellit, obliquis amplectitur, sed omnibus vel simul, vel vicissim agentibus, quâdam sui totius in orbem commotione, (velut in compositis musculis contingit) alimenta versat, miscet, attenuat, & tunicâ interioris rugis & tuberculis comminuit.

I V.

**L**ONGIUS multò cerebri patet imperium, quàm vulgò solet circumscribi: neque solum in musculos, ad externas corporis partes arbitrio voluntatis agendas, institutos, ab eo spiritus motores influunt; sed in omnia viscera, non secus ac in artus, jus suum proferunt. Viscus nimirum quodlibet, sive membranosum illud sit, sive parenchyma audiat, suis agitator fibris: quibus solutis, aut constrictis, quod amicum est excipit; quod superfluum aut incommodum respuit. Neque enim frustra, vel unius sensûs gratiâ, qui visceribus obtusior est, tot nervorum propages in eorum membranas distribuuntur; sed nervi in ipsorum intima perreptantes fibris adnectuntur; & eas pro diversâ motûs necessitate contrahunt, aut laxant. Unde fit, ut quanquàm illæ nesciâ voluntate moveantur, tamen illarum motus, pro variâ imaginationis commotione, sæpius ita temperentur, ut in violentis animi pathematis palpitent, vel repentè quiescant præcordia. Quod verò privatis partibus ad proprios usus concessum est, publicis officiis, meliore jure, ad totius æconomiam attributum est. Hinc cor non fibris modò, sed musculis pluribus instructum est, quibus indefinenter vibratur, atque etiam è vivis animalibus evulsum, sanguine vacuum, & lotum diutissimè palpitat: ut ideo, non abs re, illud robustum musculum divinus senex appellarit. Huic densâ carne & staminum robore proximus est, secundus, avium quæ semina deglutiunt, ventriculus: ex fibris enim ille tam solidis, nervis, & tendinibus musculorum more compactus est; ut vix credat aliquis, tam valida motûs instrumenta id solum muneris obtinere, ut grana devorata, quam plurimùm integra, complectatur. Animalium verò utrinque dentatorum licet, ventriculus membranosis visceribus soleat annumerari, si tamen insignes nervorum ramos, qui à sexto pari, in carnosam illius membranam discurrunt, si firmam ejus compagem, & nervosam, quâ convestitur tunicam expendamus; illum facilè musculi vices gerere, atque etiam validos, ad chyli elaborationem, posse motus obire intelligemus. Nec absurdum videtur, hisce partibus motum earum functionibus idoneum, à nervis mutuatum, adscribere, quæ in hysteriis, & melancholicis affectibus, nervorum irritatione, tam vehementer convelluntur, ut lienis, intestinorum, uteri, cordis & stomachi concussionem, oculis etiam & tactu manifestè percipiantur.

V.

**T**ANTI motus est ad absolutum primæ coctionis opus, ut ex quo cibi animantium ora subierunt, nusquàm moveri desinant. Primum enim in ore dentibus comminuantur: mox linguâ, & asperiore palati tunicâ, velut liquâ, teruntur. Ac demùm continuâ gulæ compressione ad ventriculum traducti; illius agitatione tamdiu subiguntur, donec quæ minùs divisa sunt fragmenta attenuentur, fluida solidis, tenuia crassio-

4  
 ribus admisceantur; & partes quælibet alimentorum, indefinenter conversione vim caloris æqualem percipiant, parique fermenti mole perfusa, similem quoque ebullitionem concipiant. Nec secus ac massa panis, agitatione repetita, fermento melius imbuitur; & cerevisia, vinum aut hydromel, in doliis commota, citius maturescunt, ita chylus frequenti ventriculi convolutione, ut albescit, sic & brevi generosior & perfectior evadit. Adeo ut, quod solâ vivi quantumvis caloris ope, & acidi liquoris, licet tenuissimi beneficio, sine motu, non-nisi tardiosâ temporis morâ perficeretur, eo agente prælo melius & citius absolvatur. Hinc quibus animantibus gingiva superior inermis est, ut quæ integra ferè devorant alimenta conficiantur, quadruplici ventriculo provisum est: illa nimirum in ingluvie macerata, quadratis reticuli cristis inciduntur; semilunaribus & asperis Omassi membranis teruntur; ut tandem, accedente Abomasi compressione, in chylum eliquentur. Sic & avibus quæ vel solida, vel extimâ tantum pelle nudata, grana deglutiant, duplex adest ventriculus: ut hæc in primo, humore è glandulis vicinis affluente, imbuta, in secundo tunica molæ instar sulcata munito, lapillis juvantibus quos aves absorbent, & actione validâ musculorum quibus ventriculus ille constat, in pulvem chylosam abeant. Porro; cum ciborum quidquid ventriculus exceperit, non simul colliquecat; sed sensim partes, quas rugosa illius tunica propius attingit, in chylum diffuant: partitis quoque vicibus per inferius ejus osculum ejiciantur, & perpetuâ ventriculi compressione, quod coctum & dilutum est, in intestina continuò propellitur; ut sic quod superest elaborandum, simili elidente complexu, melius absolvatur.

*Ergo ventriculi motus, ad chyli elaborationem confert.*

#### DOMINI DOCTORES DISPUTATURI.

M. Andreas de Laleu, Scholarum Professor.	M. Elias Col de Villars.	M. Antonius Geeffroy.
M. Antonius le Moine.	M. Henricus Besnier.	M. Joannes Coutier.
M. Petrus-Antonius Lepy.	M. Joannes Bessé, Doctor Hispaniarum Regina à Consiliis, & Medicus Primarius.	M. Joannes Baptista Mengin, Medicus Regis ordinarius.

Proponebat Parisiis, ANTONIUS NICOLAUS GUENAULT,  
 Parisinus, Baccalaureus Medicus, A. R. S. H. 1729.  
 à sextâ ad meridiem.